

Un dedicatorio n'esnan cu ta sigui mi aventuranan

Pa: Roland W. Peterson

TIN un grupo di hende cu ta yama tur ora, y nan ta bisa cu pa hoooooopi tempo nan no ta mira nada di mi aventura como mucha mas den courant.

Mi a bisa nan cu un par di dia pasa, a sali un articulo den prensa. Mi ta bay wak kico mi por haci, pero mi ta depende di e bondad di e prensa pa nan pone algo den courant.

Mi ta sumamente contento si cu nan a yama.

E articulo aki mi ta dedica n'e grupito cu ta yama cada bez.

Como mucha chikito mi ta cu mi tata, ta hala canaster, nort di e faro na California (Aruba).

Den e laman rond di e boto tin masha hopi tribon.

Den e canaster cu no tabatin mucho pisca, tabatin un congla ("eel") morto. Tata ta hinca su man den e canaster y ta saca e congla y ta tire den laman.

Simultaneo dos tribon ta sali for di e awa, manera dos cacho brabo, pa grap e congla.

Den aire liber nan ta lucha p'e congla, y despues nan dos ta cay bek den awa.

Tata ta bisami cu e ta e prome bez, cu el a wak algo asina.

Di ripiente mi ta sinti manera un cos banda di

e boto. E ta un tribon cu ta mas largo cu e boto chikito cu nos ta den.

E motor di e boto ta den neutral, cu ta nifica cu e motor ta sendi, pero e chapaleta no ta den rotacion (drey).

E tribon ta primi su nanishi contra e chapaleta y ta keda wak mi cu un wowo cu e ta parpadeo. Awor si mi ta spanta.

Mi a cuminsa grita tata pa wak kico en tribon ta haci. Tata cu a keda masha trankil a bisami cu e tribon ta haci nada.

E motor di e boto ta den neutral. E motor ta traha, pero e chapaleta no ta drey. E motor ta haci un sonido "zoommm" cu parche e tribon ta gusta. E sa bin mas bez, pa mishi cu e chapaleta cu su nanishi.

Mi tabata contento si ora tata a dicidi di bay for di e lugar ey.

Tata a yega contami cu e ta parshe cu tribonan ta gusta e sonido "zoommm" di e motor.

Hopi aña despues mi a wak un programma di Jacques Cousteau, unda e tabata conta e mes un cos.